

海運續案

卷一

諭旨 章奏

卷二

諭旨 章奏

卷三

本部咨文及接收咨呈

卷四

差次劄咨

卷五

船冊

半

卷六

米冊

戶部尚書臣孫

跪

奏為援照成案河海並運以裕庫儲而資周轉仰祈

聖鑒事竊維部庫支絀近年滋甚粵西軍務尚未告竣南
河復值漫口臣等已照該督等所請如數撥給銀四
百五十萬兩以濟要工此次所撥之款皆明年京支
所必需屆期籌措無資恐致束手伏念

國家量入為出制用舊章原屬有盈無絀近年因銀價
昂貴歲入之數不能如額年年常此減少積少成多
遂致一切支放皆形竭蹶當此入項短絀之日又值
出項繁多此辦理之所以掣肘也為今之計若

非有另外加增之項不足以供接濟然非有節省之費亦無術可以加增且即以節省為加增必其事曾經辦過著有成效者方可仿照而行有益無損溯查江蘇漕運自道光十年以後年年缺額約計短收數目自三四成至四五成不等十餘年來以習為故常矣然或偶行海運則全漕俱到無少缺減總緣漕船減歇則漕務幫費全數節省即以所省之費添購米石足額之故實由於此又查道光二十七年遵

旨將蘇松太二府一州漕白糧米改由海運以各州縣津貼

旗丁之費作為籌補之資計多得米三十餘萬石此

即以節省為加增而著有成效者也惟是該年海運係為籌補倉儲故多得之米全數交倉今則倉儲尚非甚缺而部庫支絀萬狀擬請將來歲蘇松太三屬新漕照案改由海運計多得之米仍可有三十餘萬石即以此米糶出換銀可得銀六十餘萬兩又三屬幫船既不出運行糧耗米等項皆歸節省計通共可得銀八九十萬兩於常年交倉米數仍無減損而多得之銀計明歲春間即可聽候部撥似於庫儲不無少補雖此項到京亦僅足兩月之用然今茲舍此而不計則來歲並此而亦無且三屬漕白既由海運則

大工興辦之後亦少此數十幫逆流挽上之重船是又一舉而兩得者也惟臣之所見究屬懸擬一切真正情形仍在蘇省當此萬分支絀之時內外臣工各宜實心實力共濟艱難俾

帑項多一分之蓄儲則度支多一分之裨益是又歸在事人員之經理得宜自收實效也相應請

旨敕下該督撫悉心體察速議妥辦以裕度支而救時艱臣愚昧之見是否有當伏乞

皇上聖鑒謹

奏

再查海運成案道光六年經大學士英 奏請試辦
是歲全漕到京並無損失道光二十七年遵

旨將蘇松太二府一州漕白改由海運爾時言者皆以風濤
盜賊藉詞阻止仰賴

成 皇帝宸謨獨斷遂收全漕俱到之益伏查蘇松常鎮太五
屬前三屆交倉漕糧道光二十九年九十七萬餘石
三十年三十餘萬石咸豐元年九十三萬餘石是五屬河運之米尚不及
二十七年蘇松太三屬海運米石之多言者於海運
之全漕到京河運之常年短缺皆置而不論惟一議
海運則羣疑激起是其言之不足為據已可概見此

海運之可行者一也至風波之說臣常訪之海上居人僉云海洋風信皆有定期商船往來即以其期為收放故失事者百不遇一沉海運在春夏之交維時東南風司令一帆順駛萬里遙征事妥行速此海運之可行者二也又盜賊之說近歲東洋盜踪未靖非無商船被刦之案然皆五月以後之事蓋緣洋盜皆閩粵人素畏北洋風寒必俟六七月間方敢北駛今歲山東石島煙臺兩案即係七月二十五日之事可為明證溯查前屆海運皆於五月內歲事彼時並無盜賊此海運之可行者三也又況商船被刦皆由水

師偷安不出巡洋所致今以

天庾正供改行海運由江南以至天津水師提鎮以下人知有責成連艘千百礮械齊備較商船聲威之壯奚啻十倍不但無虞盜劫兼可使盜望風而遁此海運之可行者四也又查漕運全書海運一條內載我朝自康熙年間開海禁以來商船往還關東天津等處習以為常駕駛之技趨向之方靡不漸推漸準愈久愈精是海運雖屬試行海船實為習慣春夏多東南風舟行尤為順利等語此書道光二十四年由臣部纂修恭逢

欽定刊頒是海運之可行已登典冊更覺信而有徵矣謹附

片陳明伏乞

皇上聖鑒謹奏咸豐元年九月二十四日奉

上諭戶部尚書孫

奏河海並運以裕庫儲一摺據稱從

前海運著有成效請將來歲蘇州松江太倉三屬新漕
照案由海海運計節省之項可補庫儲又另片奏檢查
成案歷陳海運之可行等語著陸建瀛楊文定按照所
奏各情並體察該省地方現在情形明年漕運是否有
宜變通之處務當豫為籌畫悉心妥議迅速具奏原摺
片均抄給閱看將此各諭令知之欽此

江南道監察御史臣張祥晉跪

奏為節省浮費以濟要需請將本年江蘇新漕援照前
屆海運成案推廣常鎮各屬及浙江一體遵辦仰祈
聖鑒事竊惟南漕善策莫如海運道光二十七年蘇松太
漕在於該屬節省漕贈銀米添購米三十餘萬石運
交京倉此前屆辦理之成案也而本年江浙新漕應
改海運有較之二十七年為尤甚者豐北漫口大工
甫興距來歲重運之期不遠儻屆期未能工竣固恐
有礙漕行即使依限合龍水歸故道而黃水曾經入
運秋冬水落難保無淤塞之虞如道光四年高埕缺

口運道受淤盤運滯漕費帑至九十餘萬且恐不能如期抵通有妨京倉支放此不可不先事預防者也至於南河工用浩繁尤當亟籌經費查江蘇前屆海運僅辦蘇松太屬節省銀數已不下七八十萬兩之多若將新漕推廣常鎮各屬及浙江杭嘉湖三府一體遵辦其節省當在二百萬兩以上應令毋庸添購米石即將銀兩撥解河工以濟急需是節帑費之虛糜歸工需之實用此尤海運之有裨於今日者也總之新漕改由海運既免運道淤塞之慮又濟南河要工之需且計漕糧抵通可較河運有速無遲有贏無

絀似一舉而數善兼備現值南漕開辦之時如臣言
可採應請

旨勅下江浙兩省督撫體察情形稽覈成案速議具奏臣
愚昧之見是否有當伏乞

皇上聖鑒訓示謹

奏

再前據兩江督臣陸建瀛等奏稱南河現興大工錢
價驟長每銀一兩僅易制錢一千五六百文於工需
帑項虧折甚鉅是設法以平錢價尤屬要圖向聞浙
江漕糧兼收折色而繳錢之地為多州縣以錢易銀

解兌每為市價居奇須制錢二千三四百文方能易銀一兩近年州縣虧空多緣於此如新漕改辦海運將節省銀兩撥濟工需飭令搭解錢文運交工次則州縣既可免易銀之累而河工又可免易錢之虧庶兩地錢價俱平而帑項胥歸實用矣謹附片具

奏咸豐元年九月二十五日奉

上諭昨據戶部尚書孫

奏擬行海運以裕庫儲已降

旨交陸建瀛楊文定悉心妥議具奏茲據御史張祥晉奏請將江蘇新漕援照從前海運案推廣常鎮各屬及浙省一體試辦等語南漕海運雖有舊案可循是否可以

推廣並現在地方情形是否可行著陸建瀛楊文定常大淳悉心體察迅速妥議具奏又另片奏江浙漕糧徵錢之地居多若改辦海運將節省之錢運交河工並可以平價著一併議奏原摺片均抄給閱看將此各諭令知之欽此

兩江總督臣陸建瀛江蘇巡撫臣楊文定跪

奏為蘇松常鎮太府一州漕糧遵

旨籌議海運先將覈實大概情形恭摺具奏仰祈

聖鑒事竊臣等准軍機大臣字寄本年九月二十四日奉

上諭戶部尚書孫瑞珍奏河海並運以裕庫儲一摺據稱

從前海運著有成效請將來歲蘇州松江太倉三屬新

漕照案由海海運計節省之項可補庫儲又另片奏檢

查成案歷陳海運之可行等語著陸建瀛楊文定按照

所奏各情並體察該省地方現在情形明年漕運是否

有宜變通之處務當豫為籌畫悉心妥議迅速具奏原

摺片均抄給閱看將此諭令知之欽此又續准軍機大

臣字寄九月二十五日奉

上諭昨據戶部尚書孫瑞珍奏擬行海運以裕庫儲已降
旨交陸建瀛楊文定悉心妥議具奏茲據御史張祥晉
奏請將江蘇新漕援照從前海運成案推廣常鎮各屬
及浙省一體試辦等語南漕海運雖有舊案可循是否
可以推廣並現在地方情形是否可行著陸建瀛楊文
定常大淳悉心體察迅速妥議具奏又另片奏江浙漕
糧徵錢之地居多若改辦海運將節省之錢運交河工
並可以平價著一併議奏原摺片均抄給閱看將此各

諭令知之欽此臣等伏查江蘇歲額漕糧甲於他省統計蘇松常鎮太四府一州每年照例交倉漕米一百四十餘萬石歷來州縣津貼幫費以蘇松太為最重常鎮次之近年災歉頻仍民間元氣未復以致起運米數歲有緩缺即熟田應徵之米亦復催輸不易而銀價未能平減浮費不克盡裁收兌兩難官民交困若欲力籌補救舍海運誠無良策辰下粵西軍務未竣南河復值漫口撥餉浩繁正度支孔亟之時欲於裕漕之中籌節省之計亦非海運不可臣楊殿邦正在函商籌辦間適奉

諭旨飭議臣等伏查道光二十八年海運成案蘇松太三屬二十七年額徵漕糧除熟田應徵米穀外實災缺米二十七萬三千七百餘石當時即以節省給丁餘耗等米一十六萬餘石交倉並提節省給丁漕贈等銀一十五萬餘兩以之採買米一十一萬三千餘石湊足漕額又籌補常鎮兩屬災缺米六千九百七十餘石並提隨正交倉經紀耗米一萬三千三百餘石總計二十九萬四千餘石是籌補實缺等米為數幾及三十萬石即出於節省給丁銀米其節省給丁津貼皆係抵充沙船水腳耗米及天津通壩駁運等費曾

經由部議准覆奏有案較之道光六年已屬格外節省本年夏秋風雨過多業據各屬會同委員紛紛勘報均有歉收緩缺額漕在所不免如果改由海運自應籌足額數即沙船水腳耗米暨南北公費又皆為海運所必需亦不能不藉資於節省津貼臣等督同司道及各府州悉心體察蘇松太三屬漕糧近年海運成案既收實效自當循辦而常鎮二屬幫費既經道途較遠情形本與蘇松不同非不可照舊河運惟就該御史推廣之議復加籌覈覺蘇松既歸海運即常鎮照辦亦為順易且多此兩府海運之米又省數

萬河運之資於度支不無小補應請將蘇松常鎮太
五府州應徵熟田漕白二米一律由海運津並將節
省例給旗丁餘耗等米飭令各州縣分別糶變惟刻
下江蘇米價頗賤每石不過值銀一兩加之節省漕
贈等銀約計總可得銀六七十萬查照上屆成案抵
作籌補缺額之米立限提解司庫尚未覈寔具詳現
在趕緊嚴追應俟各屬被歉頃畝科則細冊送齊之
後方能覈見實數且恐各屬科則有避就之虞數分
有浮報之處臣等自當不避勞怨認真查辦總使比
較上屆海運交倉之米不致短少所有海運一切辦

法應與道光六年及二十七年成案互相參酌容俟
覈定確數並酌擬辦理章程另行具

奏其沙船水腳耗米及南北應用經費照舊於節省津
貼項下飭提支用再南河工用奉撥蘇省銀兩經臣
陸建瀛酌量情形飭屬銀錢並解尚資接濟在州縣
徵漕間有折色亦洋錢居多況海運節省應候部撥
該御史所奏節省之錢數交河工之處應毋庸議至
於風濤之險盜賊之虞原奏辯論已詳即水手之難
以安插尤應加意防範臣等惟有督同司道詳查成
案逐一覈議次第詳奏設有今昔異宜仍當因時籌

酌分別請

旨遵行除浙江漕糧能否海運由該撫臣常大淳另行籌議具奏外相應將蘇屬五府州漕白二糧遵辦海運並抵補足數酌擬節省銀款大概情形先行合詞恭摺覆奏伏乞

皇上聖鑒訓示謹

奏咸豐元年十二月初五日內閣奉

上諭陸建瀛楊文定奏遵旨籌議海運一摺前據尚書孫瑞珍奏陳從前海運成效請將新漕援照辦理並據御史張祥晉奏請推廣成案試辦海運疊經降旨諭令陸

建瀛等體察情形悉心妥議具奏茲據該督撫籌覈大概情形先行覆奏所有來年蘇州松江常州鎮江太常五府州漕白糧米著准其一律改由海運該督撫即查照成案迅將籌辦章程詳議奏聞並著嚴飭各屬覈實認真辦理毋致滋生弊端餘著照所議辦理該部知道

欽此

浙江巡撫臣常大淳跪

奏為查明浙省漕糧難以試行海運請仍循照舊章辦理恭摺覆

奏仰祈

聖鑒事竊臣承准軍機大臣字寄咸豐元年九月二十五日奉

上諭昨據戶部尚書孫

奏擬行海運以裕庫儲等因

欽此遵

旨寄信到臣當即欽遵劄飭藩司糧道轉行有漕各府悉心妥議據實詳辦去後茲據藩司椿壽糧道胡元博

轉據杭嘉湖三府以查明浙省漕糧試行海運諸多窒礙會議詳請覆

奏前來臣復詳加察覈伏思漕運河工均為當務之急目下河工漫口運道不無淤阻工費所需孔迫誠能將新漕改行海運節省給幫銀米以濟工需兼免新漕阻滯之虞何敢不實力實心認真籌辦無如悉心體察實有萬難改行之勢緣浙省情形與蘇省不同蘇省漕額較重所收本折為給幫津貼均較浙省為多以致海運經費較之河運稍有節省浙省近年河運貼幫銀米多者每石四錢有零少者每石不及三

錢今如試行海運即以蘇省向辦海運經費每石一兩有奇之數而計較之河運非特不能節省且不敷為數甚鉅此其不能行者一也又浙江乍浦宣波雖有海口乍浦向有鐵板沙塗無船可雇宣波則相距有漕州縣寫遠又中隔兩江三壩不能一帆直達且該海口船亦無多不敷受載如改行海運亦必須從蘇省之上海放洋而浙省有漕各屬相距上海或三四百里或六七百里盤運甚遠費亦不支且上海地轄江蘇該地方官有所節制募船尚易浙省非其所轄勢必呼應不靈即使仰藉江蘇代為雇募而兩省

同時舉辦綜計額漕不下二百數十萬石約需沙船二千餘隻方可載運其時或雇用不敷或勒索居奇均不可不慮此其不能行者二也又沙船放洋時在二月中旬起運漕糧及運行經費必須歲底正初先期兌交清楚方可乘時開行浙漕收兌向遲內如嘉興秀水嘉善海鹽等縣漕米歲內完納寥寥遲至來春方能旺收積習相沿牢不可破至各屬給幫各款每至四月開幫尚多掛欠漕白錢糧延至糧艘北行猶未能完足五分之數百計追呼而漕缺大率凋殘非多方那墊不能曲為敷衍兼之浙省向非聚商之所

內河船隻亦不甚多如以三屬各州縣漕糧同時運
赴上海其間壓前等後稽擱亦必難免銀米兩項遲
誤堪虞此其不能行者三也又浙省二十一幫丁情
素稱疲累如杭嘉二府之杭二杭四海所杭三宣前
嘉白等幫從前尚可支持自道光三十年因災停運
之後殷者轉疲疲者愈累其湖屬八幫困苦尤甚旗
丁衣不蔽體食不充腹在船蓬桅槓具率多典質甚
至有折賣船板者本年起運多方調劑並將減船月
糧全行撥濟始能勉行出運今若試行海運再復停
歇則在次各船即難保其悉能完備下屆仍行河運

設有缺誤關係非輕且改行海運必須將各船水手
逐一資遣而浙省各幫均有水手欠帳多者盈千累
萬道光三十年辦理資遣

奏請撥款之外又將減丁苦蓋月糧全行貼給方能驅
散彼時該水手等因奠下運受雇故尚相安無事今
若改行海運恐該水手等慮及從此失業或藉索幫
欠逗留生事或流為盜賊擾害閭閻尤不可不防其漸
溯查嘉慶十五年暨道光五年浙省遵奉

諭旨勅議試行海運酌折額漕均經各前撫臣以窒礙難行
具摺奏覆在案彼時浙省漕務尚稱完善猶且難行

今則民困幫疲其受賠情形更非昔比有漕各屬內如海寧秀水嘉善海鹽歸安德清等州縣固已疲瘠著名其餘各邑亦不可勝言各州縣每辦一漕無不筋疲力盡咸以漕缺為畏途如果改行海運得能節省當亦無不樂從今通盤籌計較之河運之費非惟不能節省轉須加多兼之種種窒礙實有斷難改行之勢所有浙省漕糧應請仍循舊章由河運行以免貽誤並請

旨勅下兩江督臣暨江南河臣迅飭將運道設法疏濬以利漕行而免阻滯臣謹會同漕運總督臣楊殿邦據實

恭摺

奏伏乞

皇上聖鑒訓示謹

奏咸豐元年十二月十七日奉

硃批知道了既屬窒礙著暫停試辦欽此

兩江總督臣陸建瀛江蘇巡撫臣楊文定跪
奏為蘇松常鎮太四府一州應徵咸豐元年漕白糧米
全由海運酌定辦理章程恭摺奏祈

聖鑒事竊臣等議請海運奏奉

上諭陸建瀛楊文定奏遵旨籌議海運一摺前據尚書孫
瑞珍奏陳從前海運成效請將新漕援照辦理並據御
史張祥晉奏請推廣成案試辦海運疊經降旨諭令陸
建瀛等體察情形悉心妥議具奏茲據該督撫籌覈大
概情形先行覆奏所有來年蘇州松江常州鎮江太倉
五府州漕白糧米石准其一律改由海運該督撫即查

照成案迅將籌辦章程詳議奏聞并著嚴飭各屬覈實辦理毋致滋生弊端餘著照所議辦理該部知道欽此

當經欽遵轉飭遵照辦理去後臣等伏查江蘇漕務收兌兩難積疲已久欲求節費裕漕誠非海運不可本年交秋風雨過多收成復形歉薄經臣等嚴飭司道實力整頓不准絲毫浮報覈計本年熟田應徵交倉漕白米一百四萬六千二百餘石一律由海運津仍照成案於來年二月內全數放洋北上其向年例給折丁餘耗等米飭令各州縣一律糶變連節省漕贈等銀並撥節省津貼等款共銀六十六萬兩分別

立限提解報部撥用一切海運辦法本有成案可循
第查道光五年及道光二十七三十等年漕糧三次
海運或辦五屬或辦三屬或專辦白糧事勢多有不
同今居四府一州漕白二糧全歸海運正與道光五
年情形相仿彼時年穀順成全漕起運並無災緩缺
額之款除津通應用各款及應給沙船耗米概支節
省銀米外所計餘米六萬數千石隨正交倉道光二
十七年海運籌補災缺等米幾及三十萬石抵足漕
額辦理已屬不易此次銀米併計除補足交倉額米
外尚有額外餘銀二十六萬餘兩比較道光五年二

十七年又屆交倉之數均屬有贏無絀其餘兌運事宜悉循成法惟今屆節省之款以米易銀亦復少有異同臣等惟有殫屢愚忱認真督辦現就司道妥議章程覆加詳覈謹先擬十條為我

皇上陳之

一海運事繁任重必期經理得人也查海運漕糧以省城為始事以上海為總匯以天津為歸宿道光五年及二十七三十等年三次海運成案均於省城上海天津三處各委司道守丞各大員分任厥事而以縣令佐雜襄理奔走今屆自應仿照辦理飭藩司總

理全局並委員署蘇州府知府鍾殿選署松江府知府何士祁督同候補知縣吳煦查議章程勾稽款目仍由藩司會同糧道應徵銀米確數俾昭覈實其雇備沙船為海運首務飭委蘇松太道吳健彰督同候補知府洪玉珩松海防同知藍蔚雯等雇覓沙船並督飭各委員料理沙船兌收放洋各事糧道倪良燿責任糧儲應令於各屬開倉時親往查驗一次復於上海裝船時會同蘇松太道再行盤查米色均須一律乾圓潔淨白糧更宜慎重均不准稍有攙雜柔嫩不潔等弊並由糧道查明回空軍船幫次軍丁水手

各若干參酌成案分別調劑資遣至天津交米事宜尤屬喫重應即飭委該道酌帶委員先起由陸路赴津管理交兌並會同直隸委員照案妥為籌辦

一交倉漕米必須籌補足額也查道光二十七年蘇松太三屬漕糧辦理海運以節省給丁贈五餘耗等米全數交倉並提給丁漕贈等銀採買起運補足漕額在案茲查咸豐元年分蘇州松江常州鎮江太倉等四府一州額徵有閏交倉漕白正耗米一百四十四萬五千三百九十一石零除本年秋歉緩徵漕糧及丹徒縣額漕儘撥旂營兵糧並被歉緩缺統共米

三十九萬九千一百三十五石零實徵熟田交倉漕糧九十七萬四千二百四十九石零又額徵交倉白糧正耗米七萬二千六石零共計交倉漕白正耗米一百四萬六千二百五十五石零應照奏案一律由海運津至緩缺交倉漕糧米三十九萬九千一百三十五石零內除丹徒縣起運米石項下例應加截京口節歸不敷米四百八十二石零已於兵糧項下另籌買補外實計缺額米三十九萬八千六百五十二石零自應照案籌補足額今查漕白項下向應給丁贈五盤用等耗米除被歉緩徵及留支春耗等米外

共計熟田應徵節省給丁耗米二十一萬三千九百九十五石零今既專籌銀款應即飭令糶變並酌提各屬節省給丁津貼等銀湊抵緩缺漕糧米三十九萬八千六百五十二石零補足交倉全額餘歸銀款併計至沙船耗米每漕糧一石給米八升白糧一石給米一斗共計米八萬五千一百四十餘石應由各州縣捐給本年歉緩漕南米石仍俟來年秋成後查看情形按限徵完交幫搭運以符成例

一籌銀款以備撥用也今次遵

旨籌辦海運請以節省旂丁米石分別糶變不足之數再

提各屬節省給幫津貼以上屆籌補京倉米額改為
籌補銀款惟係以銀合米補足漕額仍應專稽銀數
以清眉目查本年蘇松常鎮太五屬額徵漕白項下
共計被歉緩徵米三十九萬九千一百三十五石零
查有熟田應徵給丁贈五餘耗等米二十一萬三千
九百九十五石零既辦海運即應節省現飭各該州
縣一律糶變每石合銀一兩共該糶變銀二十一萬
三千九百九十五兩零又提各屬節省給丁津貼銀
二十五萬八千三百六十四兩零並節省給丁漕贈
等銀一十八萬七千六百三十九兩零三共銀六十

六萬兩分別立限提解司庫聽候部撥除抵補緩缺
交倉額米合銀三十九萬八千六百五十二兩零外
計有額外餘銀二十六萬一千三百四十八兩零其
各屬應給沙船水腳神福犒賞暨捐購津通剝船經
紀食耗等米由縣驗運赴滬水腳等款除應給沙船
耗米歸入米款覈計外每石約需銀五錢七分五釐
按出運米數覈計共需銀六十萬一千五百九十餘
兩及南北應用公費均飭各州縣於向年應給旂丁
幫費內分別解給抵用

一籌補緩缺南糧毋庸援案截撥也查南糧項下應

支兵糧局卹等米每逢災歉年分均係截撥漕糧道光二十六年等年京倉不敷

奏明籌款買補並碾常平倉穀給發其道光二十七年

漕糧海運成案係已節省隨漕腳費買米抵放各在

案本年各屬歉收計有緩缺兵糧局卹等米二萬三千六百七十三石零此係計口授食要需不能短少今漕額既已抵足前項緩缺之米自應一體籌撥照案以節省隨漕腳費錢文飭令各州縣易銀批解分別買米抵放毋須援案截撥即常平倉穀有關民食亦可毋庸辦碾

一停運旂丁水手分別調劑資遣也查道光二十七年蘇松太三屬漕糧海運所有各幫停運軍船係委糧道查案籌款分別撫卹資遣今屆常鎮一併海運回空糧船較上屆更多現照案飭令軍船各歸兌糧水次並劄糧道參酌成案將停歇軍丁應支月糧苦蓋等銀籌款速放以卹丁力其水手人等亦由該道督飭各州縣於軍船到次之日查明水手人數開造姓名籍貫各給資遣銀兩押令速回本籍如有藉衆生事或盤踞不散嚴拏究辦

一沙船領運漕糧悉遵成案也查道光五年漕糧海

運沙船運米抵津如無故短少即令賠補儻驗有所
挽鬆艙等情事

奏明豁免道光二十七年援案辦理惟沙船八成載米
二成載貨如在洋遭風並未拋棄貨物獨棄官糧者
雖驗有鬆艙屬實其短少米石仍勒令賠補今次自
應照辦現在雇定沙船先行趕緊修艙編列號檔停
青浦水次聽候派兌其未經進口之船現已咨行各
海口一體招徠歸塢一俟米數兌齊陸續放洋北上
仍援照上屆成案准其二成載貨

恩免納稅除運米一萬石以下由外給獎其自一萬石至

五萬石以上分別給與職銜若捐至五品無可再加或另行酌獎事竣

奏請辦理又道光五年成案沙船抵津交兌之後所餘耗米曾經

奏明官為收買道光二十七年漕糧海運准令商船在津自行變賣餘米此次亦應照辦

一巡督防護倍宜周密也查道光二十七年漕糧海運

奏明仿照閩廣商船赴津貿易之例准令沙船各帶軍器俾資防護仍於入口時呈繳出口時給領以備稽

考並遴派武職大員親為護送仍派兵一千名沿海巡防各在案現當整飭洋面之際沿海水師巡防係其專責毋庸派員調兵押送轉致稽延即令各該水師鎮將統帶備弁兵船沿途護送出境仍咨直隸山東等省照案一律防範接護以昭慎重其沙船攜帶軍器亦照舊章辦理

一籌備天津通倉經費照案支用也查道光二十七年漕糧海運除輕齋由閘竹木等項照例批解外其天津官剥民剥雇價通倉經紀夫役飯食等項均由蘇籌備解津由江蘇交米委員會同直隸委員按照

起運米數分別支應此次自應照章辦理輕齋由開
 竹木等款照例由糧道衙門批解並天津剝船食米
 通倉經紀耗米另行備帶本色外其餘應需經費仍
 由蘇省籌措解往由直隸江蘇兩省委員查照成案
 逐一酌給絲毫不動

帑項

一剝船經紀食耗等米備帶本色也查道光二十七
 年漕糧海運天津剝船食米按照米數給發折色其
 通倉經紀耗米係江蘇委員收買沙船餘米隨正兌
 交經

欽差收米大臣德誠等於漕糧起卸完竣摺內聲明

奏報在案查上屆舊章剥船食米每漕米一石給食米一升一合五勺每石折給銀一兩四錢其通倉經紀耗米每漕糧一石給耗米一升五合白糧一石給耗米一升八合均以洪斛覈計現在詳稽成案剥船食米係給船戶飯食之用經紀耗米係備赴通折耗之需此二項本係米款與其折銀給發或赴津購米徒滋轉折此次應即備帶本色現飭辦漕各州縣如數措備計本年海運漕白二糧一百四萬六千二百餘石共需食耗等米二萬七千九百餘石隨正兌交沙

船一律運京按交倉米數分別兌交給發

一天津交米之後循舊責成經紀也查道光五年漕糧海運欽奉

上諭海船押運到津經紀人等難免需索刁難著軍機大臣屆期奏請欽派一二員前往等因道光二十七年成案經部授案

奏明由直隸派委天津道駐津總辦倉場揀派坐糧廳酌帶經紀斛收戶部奏請

欽派大臣一人倉場侍郎一人赴津查驗及道光三十年蘇松常太四屬海運白糧亦係仿照辦理各在案自三

次海運以來確有舊章可循已屬詳慎周密此次仍請照由各衙門屆時

奏派米到天津驗收之後即與沙船無涉以免羈候其由津運通之剝船中途如有侵耗滲涇責成經紀承管庶免攙雜使水等弊以上各條臣等欽遵

諭旨詳考成案參酌時宜悉心妥議意見相同謹臚列額請

訓示遵辦其有未盡事宜再行隨時陳奏所有臣等會議海運章程緣由謹會同漕運總督臣楊殿邦合詞具奏是否有當伏乞

卷一

二十六

皇上聖鑒訓示謹

奏咸豐二年正月十三日奉
硃批戶部妥速議奏欽此

戶部謹

奏為遵

旨妥速議奏仰祈

聖鑒事咸豐二年正月十三日兩江總督陸建瀛江蘇巡撫楊文定會同漕運總督楊殿邦奏蘇松常鎮太四府一州應徵咸豐元年漕白糧米全由海運酌定辦理章程一摺奉

硃批戶部妥速議奏欽此欽遵於正月十四日抄出到部據原奏內稱查江蘇漕務收兌兩難欲求節費裕漕誠非海運不可臣等嚴飭司道覈計熟田應徵交倉

漕白米一百四萬六千二百餘石由海運津仍照成
案於二月內全數放洋北上其例給旗丁餘耗等米
一律糶變連節省漕贈等銀并提節省津貼等款共
銀六十六萬兩立限提解報部撥用一切海運辦法
本有成案可循惟今屆節省之款以米易銀亦復少
有異同現就司道妥議章程覆加詳覈謹先擬十條等
因奉

旨交臣部妥速議奏臣等按照各條公同詳加酌覈恭摺
覆奏謹呈

御覽

一海運事煩任重必期經理得人一條據稱擬令藩司綜理全局并委員署蘇州府知府鍾殿選署松江府知府何士祁督同候補知縣吳煦查議章程勾稽款目蘇松太道吳健彰督同候補知府洪玉珩松海防同知藍蔚雯雇覓沙船糧道倪良燿盤查米色并查明軍丁水手分別調劑資遣至天津交米尤屬吃重即飭委該道酌帶委員先期赴津管理交兌並會同直隸委員照案籌辦等語臣等查上屆漕糧海運該省均於省城上海天津三處各委司道守丞等員分任厥事在案茲據奏稱藩司綜理全局并委各該

署府督同候補知縣等勾稽款目蘇松太道吳健彰
督同候補知府及該同知等雇備沙船糧道倪良燿
赴津交兌一切覈與案符均應如所奏辦理仍飭該
藩司會同該糧道詳稽應徵帶徵正耗及漕項銀米
各數先行報部毋稍延誤其雇船事宜仍飭該道認
真經理應給沙船水腳耗米等項務宜嚴加防範毋
任假手書吏少有需索剋扣其查驗米色並調劑軍
丁資遣水手均係糧道專責應即責成該糧道詳慎
辦理漕糧務須乾圓潔淨一律粳米白糧尤應慎重
均不准有私米攙雜及柔嫩潮潤等弊應如所奏

令該糧道於開倉時親歷查驗復於上海交兌再加盤查仍查照舊章箒裝米樣粘貼印花以便到津稟請驗米大臣比對至天津交米尤關緊要亦應如所奏令該糧道先期早抵津門管理交兌并會辦撥船一切事宜毋稍遲延致滋貽誤

一交倉漕米必須籌補足額一條據稱咸豐元年蘇松常鎮太四府一州實徵熟田漕糧額徵白糧共計正耗米一百四萬六千二百五十五石零一律由海運津至緩缺漕糧米三十九萬九千一百三十五石零內除丹徒縣加裁京口不敷米四百八十二石零

另籌買補外實計缺額米三十九萬八千六百五十
二石零自應籌補足額查漕白項下共計熟田應徵
節省給丁耗米二十一萬三千九百九十五石零今
既專籌銀款應即飭令糶變並酌提節省給丁津貼
等銀湊抵緩缺米三十九萬八千六百五十二石零
補足全額餘歸銀款併計其沙船耗米共計八萬五
千一百四十餘石應由各州縣措給款緩漕南米石
仍俟秋後查看情形按限徵完交幫搭運以符成例
等語臣等查道光二十八年辦理海運以節省給丁
等米交倉並提給丁等銀買米補足漕額在案今據

奏稱實徵熟田漕糧額徵白糧共正耗米一百四萬六千二百五十五石零一律由海運津緩缺漕糧米三十九萬八千六百五十二石零籌補足額查此次海運專為籌補銀款該省補足額漕米數仍歸銀款併計應如所奏辦理其沙船耗米八萬五千一百四十餘石亦應准其由各州縣措給務令全交本色以備到津或有折耗賠補之用如查有私折等弊即將州縣叅處至咸豐元年歉緩漕南米石仍飭俟咸豐二年秋後按限徵完交幫搭運毋任所屬捏災遞緩其海運漕白二糧應即飭令分別各府縣正改兌正

耗米各細數詳造妥冊先期由陸路齎至天津以備
驗米大臣查覈毋稍遲延

一籌銀款以備撥用一條據稱今次海運請以節省
給丁米石分別糶變不足之數再提節省給幫津貼
以上屆籌補京倉米額改為籌補銀款仍應專稽銀
數以清眉目查有熟田應徵給丁贈五餘耗等米二
十一萬三千九百九十五石零一律糶變每石合銀
一兩共該糶變銀二十一萬三千九百九十五兩零
又提各屬節省給丁津貼銀二十五萬八千三百六
十四兩零並節省給丁漕贈等銀一十八萬七千六

百一十九兩零三共銀六十六萬兩分別立限提解
庫聽候部撥其各屬應給沙船水腳神福犒賞及
措購津道剝船經紀食耗等米由縣剝運赴滬水腳
等款除應給沙船耗米歸入米款覈計外每石約尚
需銀五錢七分五釐按出運米數覈計共需銀六十
萬一千五百九十餘兩及南北應用公費均飭各州縣
於向年應給旗丁幫費內分別解給抵用等語臣等
查此次海運專籌銀款據稱查有熟田應徵給丁米
二十一萬三千九百九十五石零一律糶變每石合
銀一兩共該銀二十一萬三千九百九十五兩零又

節省給丁津貼銀二十五萬八千三百六十四兩零
又節省給丁漕贈等銀一十八萬七千六百三十九
兩零三共銀六十六萬兩應令提解司庫聽候部撥
應用其各屬應給沙船水腳等款共需銀六十萬一
千五百九十餘兩及南北應用公費於給丁幫費內
解給抵用均應如所奏由外籌給分別辦理

一籌補緩缺南糧毋庸援案截撥一條據稱本年緩
缺兵糧局恤等米二萬三千六百七十三石零此係
計口授食要需自應一體籌撥照案以節省隨漕腳
費錢文易銀批解買米抵放毋須援案截撥即常平

倉穀亦可毋庸動碾等語臣等查兵糧局恤等米如
有緩缺上年因籌備京倉臣部奏明嗣後不准截留
漕糧旋由該省奏明籌款買補并碾常平倉穀給發
並於道光二十八年海運案內聲明庫款各有支項
常平倉亦關緩急碾難再動奏准在於海運節省隨
漕腳費銀兩內動支採買放給在案此次循照舊章
應如所奏辦理仍令覈實報銷用有盈餘報部候撥
一停運旗丁水手分別調劑資遣一條據稱道光二
十八年漕糧海運停運軍船係查案籌款分別撫恤
資遣今屆常鎮一併海運回空糧船更多現飭令軍

船各歸水次並參酌成案將應支月糧苦蓋等銀籌
款速放水手人等亦於到次之日查明人數開造姓
名籍貫各給資遣銀兩押令速回本籍等語臣等查
上屆海運成案停運旗丁係由糧道將卹丁舊案參
酌墊放水手係令各州縣開造人數姓名住址清冊
給銀資遣回籍茲據奏稱今屆停船較多現將月糧
苦蓋等銀籌款速放水手人等各給資遣銀兩均與
案符應准照辦仍飭嚴行查察勿令書役絲毫累及
閭閻並不得假手吏胥留難剋扣幫船向係漕務官
員所轄仍令漕運總督諄飭各衛備弁妥為約束務

臻靖謚如有水手藉眾盤踞即飭嚴拏究辦毋任稍存大意致滋事端

一沙船領運漕糧悉遵成案一條據稱沙船八成載米二成載貨如在洋遭風並未拋棄貨物獨棄官糧者雖驗有鬆艙屬實其短少米石仍勒令賠補今次自應照辦其二成載貨

恩免納稅除運米一萬石以下由外給獎其自一萬石至五萬石以上分別給予職銜若捐至五品無可再加或另行酌獎又道光六年沙船抵津交兌之後所餘耗米官為收買道光二十八年准令商船在津自行

變賣此次亦應照辦等語臣等查上屆海運成案沙船八成載米二成載貨免其納稅如在洋遭風除斫桅鬆艙驗明糧貨俱損仍奏明豁免外如貨物並未拋棄獨棄官糧者雖鬆艙屬實短少米石仍令賠補此次自應照辦以昭覈實其所稱應募各商除一萬石以下由外給獎其自一萬石以上至五萬石以上分別給予職銜若捐至五品無可再加或另酌獎等語覈與案符應俟事竣奏請辦理至餘米一項道光六年係官為收買道光二十八年准令商船自行變賣應俟沙船抵津交兌時由江蘇派出駐津糧道察

有無應須賠補穀明米數稟請驗米大臣隨時酌辦

一巡哨防護倍宜周密一條據稱漕糧海運准令沙船各帶軍器於入口時呈繳出口時給領並選派武職大員親為護送仍派兵一千名沿海巡防各在案現當整飭洋面之際沿海水師巡防係其專責毋庸派員調兵押送轉致稽延即令各該水師鎮將統帶備弁兵船沿途護送出境仍咨直隸山東等省照案一律防範接護等語臣等查上屆海運准令沙船各帶軍器並派武職大員護送仍派兵一千名沿海巡

防各在案此次應如所奏照章辦理惟沙船軍器於入口時呈繳出口時給領務宜實力稽查毋令稍滋流弊至所稱沿海水師巡防係其專責即責成各該水師鎮將沿途護送並直隸山東等省一律防範接護等語臣等查百萬正供攸關支放現當懋飭洋面之時尤為緊要應飭該督撫及直隸山東各督撫等務須嚴飭各該水師鎮將統帶備弁兵船逐段巡查逐程護送斷不可稍事偷安致滋疎懈如有前項弊端即行據實奏毋任互相諉卸致干重咎一籌辦天津通倉經費照案支用一條據稱漕糧海

運除輕費由開竹木等項照例批解外其天津官剝民剝雇價通倉經紀夫役飯食等項均由蘇籌備解津由江蘇交米委員會同直隸委員按照起運米數支應絲毫不動

帑項等語臣等查上屆海運成案除輕費等項照例批解外其天津撥船之雇價通倉經紀夫役之口食等項均由外籌備不動

帑項此次循照舊章應如所奏辦理應令該省按照現籌海運米數先將約計需用銀兩解交天津道庫以備應用仍由該省委員先期到津會同覈定數目報

部查覈總之沙船抵津愈早愈妙當河運南糧未到之先早為歲事所籌經費自可無虞支絀

一剝船經紀食耗等米備帶本色一條據稱上屆舊章剝船食米每漕米一石給食米一升一合五勺每石折給銀一兩四錢其通倉經紀耗米每漕糧一石給耗米一升五合白糧一石給耗米一升八合均以洪斛合計現在詳稽成案剝船食米係給船戶飯食之用經紀耗米係備赴通折耗之需此二項本係米款與其折銀給發或赴津購米徒滋轉折此次應即備帶本色計本年海運漕白二糧一百四萬六千二

百餘石共需食耗等米二萬七千九百餘石隨正兌
交沙船一律運津按交倉米數分別兌交給發等語臣
等查上屆海運章程天津剝船食米係按照米數給
發折色通倉經紀耗米係收買沙船餘米隨正兌交
在案今據奏稱剝船食米係給船戶飯食之用經紀
耗米係備赴通折耗之需應即備帶本色等語查此
二項本係米款應准其備帶本色以免周折惟剝船
經紀如有分賠之案經紀項下例在於耗米內計除
其剝船項下作何辦理之處應令直隸總督詳囑
議務使米歸有著不准顆粒延欠

一天津交米之後循舊責成經紀一條據稱漕糧海運由直隸派委天津道駐津總辦倉場揀派坐糧廳酌帶經紀斛收戶部奏請

欽派大臣一人倉場侍郎一人赴津查驗米到天津驗收之後即與沙船無涉以免羈候其由津運通之剝船中途如有侵耗溻濕責成經紀承管庶免攙雜使水等弊等語臣等查沙船抵津之後由驗米大臣會同倉場驗明米色交坐糧廳督飭經紀斛收載入撥船由津運通此際稍有誣卸則百弊叢生前功盡棄該督撫等所稱責成經紀承管一節最關緊要溯查歷

屆成案疊經奏明米之乾潔總以到津時查驗為憑
公同查驗具結起撥後即涉經紀之手如有霉變潮
潤即惟經紀是問不准以代役充數剝船兌足由經
紀自撥親信妥人分起押運仍派文職武弁各一員
隨帶兵役督同船頭彈壓照料一俟運抵通壩各員
稟知倉場馳回接押尾後各起聽經紀所派之人自
行文倉等因在案此次漕糧抵津自應仍照舊章由
驗米大臣會同倉場坐糧廳直隸江蘇各委員眼同
查驗明確如沙船本有霉變即由江蘇委員責令該
商等於准給耗米內賠補如係好米即由坐糧廳取

具該經紀米色乾潔米數無虧切結督令斛收由經紀自派親信妥人押運交倉如撥船在路有偷漏攙和等弊立即稟知押運員弁拏交州縣責令撥船賠補治以應得之罪如經紀索費不遂故縱使水偷漏然後稟明洩忿及通同作弊分肥隱匿不稟經押運委員查出或別經發覺應責令經紀撥船分成賠補并各治以應得之罪糧米抵通委員馳回押運後起撥船亦即起卸回空此後由裡河轉運大通橋均係經紀料理如有短少潮濕經大通橋及應行收米之倉監督查出均惟經紀是問不得牽涉外河撥船更

不得牽涉原裝沙船入倉以後如有灰黯霉變及那
移牽混等弊則責在該倉應令該倉賠補治花戶以
應得之罪不得牽涉經紀更不得牽涉外河撥船及原
裝沙船如此劃清界限層層防範總期實心實力有
弊必除庶幾于事有濟其直隸派委押運文武員弁
催備彈壓是其專責務令撥船銜尾逆行毋任稍有
逗遛並嚴防經紀人等滋弊毋少疎懈致干叅處
以上各條臣等謹就原奏叅酌成案公同詳覈恭摺
覆奏此外應辦一切事宜均有成規可仿應令確查
舊章一體遵照所有臣等遵

旨妥速議奏緣由謹恭摺具奏伏乞
皇上聖鑒訓示謹

奏

咸豐二年正月十九日具奏本日奉

旨依議欽此

戶部謹

奏為查驗海運漕糧照案先期奏請

欽派事竊查上屆海運蘇州松江太倉二府一州漕糧到
津交收經臣部援照成案豫行奏請

欽派大臣一人會同倉場侍郎一人屆期赴津查驗於道光
二十八年正月二十二日欽奉

上諭戶部奏查驗海運漕糧先期奏請派員等語著派朱鳳
標德誠屆期前往天津認真查驗兌收欽此欽遵在案本
屆咸豐二年起運咸豐元年徵收蘇州松江常州鎮
江太倉四府一州漕白糧米較之上屆海運二府一

州漕白糧米為數尤多應即查照成案奏請
欽派大臣一人會同倉場侍郎一人俟天津鎮道呈報沙
船抵津即行率同隨帶司員遵奉前往理合恭摺具
奏並將近年歷屆驗收海運米石戶部侍郎倉場侍
郎開列名單恭呈

御覽伏乞

皇上訓示謹奏請

旨

謹將歷屆驗收海運漕糧商米戶部侍郎倉場侍郎
開列名單恭呈

御覽

道光二十六年收買江蘇商米一萬一千四百石奉

旨派戶部左侍郎臣柏蔭倉場侍郎臣陳孚恩

道光二十七年江督奏請派收江浙商米四十一萬

餘石奉

旨派戶部右侍郎臣花沙納倉場侍郎臣陳孚恩

道光二十八年驗收海運正漕米一百九萬六千餘

石奉

旨派戶部右侍郎臣朱鳳標倉場侍郎臣宗室德誠

咸豐元年驗收海運白糧七萬二千餘石奉

旨派倉場侍郎臣朱嶧

咸豐二年正月十五日具奏奉

硃批著派孫

慶屆期前往驗收欽此

陸建瀛片

再本年蘇州松江常州鎮江太倉等五府州屬起運漕白糧米業經臣等奏蒙

諭旨全由海運將來天津交兌事宜最為繁重必須緝練漕務廉幹有為之員庶克經理前於海運章程內奏委蘇松糧道倪良燿赴津總司其事惟籌辦撥船稽覈米數一切事務較繁上屆均隨帶丞倅各員同往照料有案查有候補知府洪玉珩候補同知王家珮朱鈞梁逢辰候補知縣吳煦等堪以隨同倪良燿赴津俟漕船到時即會同直隸地方官妥為辦理庶幾

各專責成謹合詞附片陳明伏乞

聖鑒謹

奏咸豐二年二月十二日奉

硃批知道了欽此

直隸總督臣訥爾經額片

奏再查本年江南蘇松常鎮太五府州屬應徵咸豐元年漕白糧米全由海運接准部咨行令遵照舊章派委道員赴津會同天津道設局總理並一切如何照章籌辦之處迅速奏明報部以憑覈辦等因查南糧海運曾有奏定章程上屆即係循照舊章並無應行變通之處本年海運漕糧應照案派委道員前往會辦查有清河道譚廷襄堪以派委駐津會同天津道遵照舊章迅速辦理除經檄飭遵並咨戶部外所有派委道員前往會辦海運緣由理合附片具

奏伏乞

聖鑒謹

奏咸豐二年二月十九日奉
硃批知道了欽此

兩江總督臣陸建瀛等片

奏再本年海運米船前經

奏明責令各該管水師鎮將統帶備弁兵船沿途防護
現又派撥捕盜勇船護送出洋固昭周密惟沙船奢
舵水手人數衆多往往於所過口岸停泊稽延必須
有人約束催趙茲據上海局委員候補知府洪玉珩
稟稱查有在籍刑部員外郎王承基分發安徽候補
知縣沈譽來均係商董熟悉海洋情願捐資雇募水
勇分為頭尾兩幫督押糧米北上以資約束而聯聲
勢請照道光六年海運崇明舉人施彥士等押運米

船成案具

奏前來伏查該董等情殷報効不避風濤之險尚屬急
公似未便阻其報効之忱除飭遵外謹合詞附片
陳明伏乞

聖鑒謹

奏咸豐二年二月十九日奉

硃批知道了欽此

兩江總督臣陸建瀛江蘇巡撫臣楊文定跪

奏為恭報海運漕白糧米已裝各船開至十潞守風放
洋日期循案先行由驛馳奏仰祈

聖鑒事竊照蘇松常鎮太四府一州屬咸豐元年漕白糧
米經臣等奏奉

諭旨全由海運當飭將漕白米色加意挑選責令蘇松糧

道倪良燿蘇松太道吳健彰復加查驗招雇沙船裝運在案茲據各屬將頭批米石陸續
剝運赴滬隨到隨驗督飭免裝截至正月三十日止計共兌漕糧正耗等米三十八萬
五千五百一十六石零白糧正耗米二萬一千四百
二十七石零內除應給沙船漕白耗米及津通食耗二

米外實共起運交倉漕白糧米三十六萬七千三百
八十一石零分裝沙船三百餘隻所有應給水腳等
項分別給發清楚取具領狀互結並委員查明各船隨
帶器械飭令駛出吳淞口至十漊寄旋守過二月初
八日風信放洋北上由司道暨上海局員詳請具
奏前來伏查海運沙船出口先經副委崇明縣知縣孫
豐馳往十漊稽查催趲期放洋並令水師鎮將帶
兵沿途巡哨防護俟米船放至十漊齊幫統於二月
初八日後察看風色順利聯艚開行惟此時海洋雖
屬平靜而漕糧為

天庾正供尤當慎益加慎查上海設有勇船捕盜甚為得力茲特派艇船六隻開風船二隻水勇五百名即令勇頭王之敬管帶護送米船出洋與沿途水師各營氣勢聯絡以壯聲威而昭慎重除催令續後米石趕緊源源兌運依限二月內全數開洋不准稍有遲逾一面飛咨本省鄰省沿海各鎮營督帶兵船嚴密巡護並咨戶部查覈外合將海運米石已裝各船開至十漉守風放洋日期謹照案會同漕臣楊殿邦恭摺由驛馳奏伏乞

皇上聖鑒謹

奏咸豐二年二月十九日奉
硃批知道了欽此

兩江總督臣陸建瀛江蘇巡撫臣楊文定跪
奏為海運漕白糧米責成沿海各鎮營親督師船妥為
防護恭摺具

奏仰祈

聖鑒事竊臣等遵

旨籌議海運一案已臚列章程具奏內巡哨防護一條聲
明沿海水師巡防是其專責毋庸派員調兵押送轉
致稽延即令各該管水師鎮將統帶兵船護送出境
仍咨直隸山東等省一體防範接護在案茲准

欽差戶部尚書孫 咨開漕糧為

天庾正供該督撫等所稱毋庸另行派員調兵即令各該水師護送接護一節自係為專其責成以免誣卸起見惟專任者何人分任者何人如何嚴飭各該員弁實力奉行不致稍有鬆懈並於各省交界處所如何嚴密防範聲息相通不致互相推諉之處未據詳細聲敘相應飛咨即將咨詢各款熟籌妥議迅速具奏並由江省飛咨山東巡撫直隸總督一體遵照辦理以免疎虞等因查道光六年二十八年兩次海運均派委武職大員帶兵護送六年係派兵六百名二十八年係派兵一千名原為慎重其事無如各營遠近

不一未能刻期到齊以致兌米之後守候稽延因而盜賊生心米質被罨種種不便是以咸豐元年海運白糧臣陸建瀛與撫臣傅繩勛定議免派武職大員帶兵護送以免停船守候轉致遲延之弊是年到津妥速即其明驗今屆常鎮蘇松太四府一州漕米白糧徑行海運較之專運白糧雖有多寡之殊而辦理仍無二致自應查照前案沙船受兌之後即飭令陸續開洋赴津不准逗留崇明亦不准進泊山東各島如敢故違查有損失責令該船主照數賠償自行運津交兌其山東直隸兩省亦照案咨請巡護以備不

虞惟道光二十八年係開明船數米數先行咨照此次既不停泊山東一律駛赴天津收口驗兌自無須先咨船米數目以省浮文臣等往返函商意見相同當飭各屬遵照辦理現准戶部尚書臣孫 咨詢前來復查蘇屬本年海運漕白糧米在內洋則責成署福山鎮錢朝舉會同提右營水師叅將准升太湖協劉長清吳淞營叅將陳長泰彈壓巡防在外洋則責成蘇松鎮總兵葉長春狼山鎮總兵王鵬飛各帶本標水師弁兵按段稽查巡護務保無虞其山東直隸洋面仍咨請各督撫 臣照飭沿海鎮營各按各境嚴

密巡查總期安抵天津勿稍疎失為要所有准咨緣由
除咨覆

欽差戶部尚書孫 查照並分別咨行外謹合詞恭摺具
奏伏乞

皇上聖鑒訓示謹

奏咸豐二年二月十七日奉

硃批戶部知道欽此

兩江總督臣陸建瀛江蘇巡撫臣楊文定跪

奏為恭報海運漕糧續裝數目跟接前幫放洋日期謹
再由驛馳

奏仰祈

聖鑒事竊照蘇松常鎮太五府州屬漕白糧米全由海運
截至正月三十日止共兌交倉漕白正耗米三十六
萬七千三百餘石業經臣等由驛馳奏在案茲據上
海局委員候補知府洪玉珩等詳報截至二月二十
日止共續兌漕糧正耗等米三十二萬三千六百十
五石零白糧正耗等米二萬七千五百一十一石零內

除應給沙船耗米以及津通食耗等米外實該運米倉
漕白正耗米三十一萬六千八百二十四石零分裝
沙船三百餘隻其應給水腳等項照案發給清楚並
飭委員查明各船隨帶器械一律駛出吳淞跟幫開
行連前共船六百餘隻統計交倉米六十八萬四千
二百餘石接續放洋北上其餘米石仍督令趕緊斛
兌開行詳請具

奏前來伏查運米沙船出口現經照案咨會水師鎮將
帶兵沿途巡哨防護俟米船放至十漈齊幫察看風
色順利聯幫開行並特派上洋勇船護送出洋臣等

仍催令續後米石趕緊源源兌運勒限二月內全數
開洋不准稍有遲逾一面飛咨本省隣省沿海各鎮
營督帶兵船嚴密巡護以昭慎重除將續兌米數咨
部查覈外合將海運米石續裝沙船開行日期謹照
案會同漕臣楊殿邦恭摺由驛馳

奏伏乞

皇上聖鑒謹

奏咸豐二年三月初七日奉

硃批知道了欽此

倉場侍郎臣慶 臣朱 跪

奏為委派坐糧廳隨同兌收海運漕糧仰祈

聖鑒事竊臣等接准戶部咨開本部具奏查驗海運漕糧

請

欽派大臣一摺咸豐二年正月十五日奉

硃批著派孫 慶 屆期前往驗收欽此移咨前來臣等

查道光六年二十八年海運成案向派坐糧廳一員

帶領經紀人等隨同查驗兌收此次蘇州松江常州

鎮江太倉四府一州漕白糧米均由海運自應查照

舊章辦理臣等公同商酌擬派坐糧廳刑部郎中甄鍾

隨同認真查驗並飭慎選妥實可靠經紀人等前往
斛收嚴禁從中需索等弊總期於漕務倉儲均有裨
益理合恭摺奏

聞伏乞

皇上聖鑒謹

奏咸豐二年二月十一日奏本日奉

旨知道了欽此